

**BOSNA I HERCEGOVINA**  
Konkurencijsko vijeće



**БОСНА И ХЕРЦЕГОВИНА**  
Конкуренијски савјет

**R J E Š E N J E**

**o nepostojanju zloupotrebe dominantnog položaja  
privrednog subjekta HD-WIN d.o.o.**

**Sarajevo**  
**juni, 2015. godine**



**Broj: 05-26-2-013-44-II/14**  
**Sarajevo, 09.06.2015. godine**

Na osnovu člana 25. stav (1), člana 42. stav (2) i člana 11. stav (3), u skladu s članom 11. stav (2) Zakona o konkurenciji («Službeni glasnik BiH», br. 48/05, 76/07 i 80/09) i člana 105. Zakona o upravnom postupku («Službeni glasnik BiH», br. 29/02, 12/04 88/07, 93/09 i 41/13), rješavajući po posebnom zahtjevu za donošenje rješenja broj: 05-26-2-013-40-II/14 od 13.05.2015. godine, privrednog subjekta Telemach d.o.o. Džemala Bijedića 216, 71 000 Sarajevo, Bosna i Hercegovina, podnesenog putem advokata Nihada Sijerčića, Trg djece Sarajeva 1/V, 71 000 Sarajevo, Bosna i Hercegovina, Konkurencijsko vijeće je na 105. (stopetoj) sjednici održanoj dana 09.06.2015. godine, donijelo

### **R J E Š E N J E**

1. Smatra se da privredni subjekat HD-WIN d.o.o., Visokog Stevana 38, 11 000 Beograd, Republika Srbija, u skladu sa članom 11. stav (2) Zakona o konkurenciji, ne zloupotrebljava dominantan položaj u smislu člana 10. stav (2) tačke a) i c) istog zakona.
2. Ovo Rješenje je konačno i bit će objavljeno u «Službenom glasniku BiH», službenim glasilima entiteta i Brčko Distrikta Bosne i Hercegovine.

### **O b r a z l o ž e n j e**

Konkurencijsko vijeće je dana 21.05.2014. godine zaprimio Zahtjev za pokretanje postupka broj: 05-26-2-013-II/14 (u daljem tekstu: Zahtjev) podnesen od strane privrednog subjekta Telemach d.o.o. Džemala Bijedića 216, 71 000 Sarajevo, Bosna i Hercegovina, (u daljem tekstu: Podnosilac zahtjeva ili Telemach) putem advokata Lane Deljković, Trg djece Sarajeva 1/V, 71 000 Sarajevo, Bosna i Hercegovina, protiv privrednog subjekta HD-WIN d.o.o., Visokog Stevana 38, 11 000 Beograd, Republika Srbija (u daljem tekstu: Protivna strana ili HD-WIN), radi zloupotrebe dominantnog položaja iz člana 10. stav 2) tačke a) i c) Zakona o konkurenciji ("Službeni glasnik BiH", broj 48/05, 76/07 i 80/09, u daljem tekstu: Zakon).

Analizom dostavljenog Zahtjeva i dokumentacije, Konkurencijsko vijeće je utvrdilo da ista nije potpuna i kompletna, u smislu člana 28. stav (2) Zakona, te je dana 28.05.2014. godine pod brojem 05-26-2-013-1-II/14 uputio zahtjev za dopunu dokumentacije.

Podnosilac zahtjeva je dopunio Zahtjev dana 13.06.2014. godine podneskom zaprimljenim pod brojem 05-26-2-013-2-II/14.

Nakon kompletiranja Zahtjeva, Konkurencijsko vijeće je dana 25.09.2014. godine (akt broj: 05-26-2-013-3-II/14) Podnosiocu zahtjeva izdalo Potvrdu o prijemu kompletnog i urednog Zahtjeva, u smislu člana 28. stav (3) Zakona o konkurenciji.

Konkurencijsko vijeće je ocijenilo da nije moguće bez provedenog postupka utvrditi postojanje povrede Zakona o konkurenciji na koje Podnosilac zahtjeva ukazuje, te je donijelo Zaključak o pokretanju postupka, broj: 05-26-2-013-5-II/14 dana 25.09.2014. godine (u daljem tekstu: Zaključak), protiv privrednog subjekta HD-WIN radi utvrđivanja zloupotrebe dominantnog položaja iz člana 10. stav 2) tačke a) i c) Zakona.

U skladu sa članom 33. stav (1) Zakona, Konkurencijsko vijeće je dostavilo Zaključak i Zahtjev na očitovanje aktom broj: 05-26-2-013-9-II/14 dana 26.09.2014. godine privrednom subjektu HD-WIN

U ostavljenom roku za dostavu odgovora, privredni subjekt HD-WIN podneskom broj: 05-26-2-013-13-II/14 od dana 24.10.2014. godine, zatražio je odobrenje produženja roka za dostavu odgovora na zaprimljeni Zaključak za dodatnih 15 (petnaest) dana. Konkurencijsko vijeće je razmotrilo navedeni zahtjev i utvrdilo da postoje opravdani razlozi za usvajanje istog, te je u skladu sa člankom 33. stavak (4) Zakona odobrilo produženje roka za dostavljanje odgovora.

Dana 11.11.2014. godine pod brojem: 05-26-2-013-15-II/14 Konkurencijsko vijeće je zaprimilo Odgovor na zahtjev za pokretanje postupka privrednog subjekta HD-WIN.

Imajući u vidu složenost predmeta, kao i da je za utvrđivanje činjeničnog stanja i ocjenu dokaza bilo potrebno izvršiti dodatne analize, te da se radi o osjetljivim tržištima, Konkurencijsko vijeće je ocijenilo da je rok za donošenje konačnog rješenja iz člana 41. stav (1) tačka c) Zakona potrebno produžiti za dodatna tri mjeseca u smislu člana 41. stav (2) Zakona, te je dana 18.12.2014. godine aktom broj: 05-26-2-013-23-II/14 donijelo Zaključak o produženju roka za donošenje rješenja za dodatna 3 (tri) mjeseca radi utvrđivanja postojanja zloupotrebe dominantnog položaja.

Obzirom da u relevantnom periodu u kojem je trebalo biti doneseno konačno rješenje u predmetnom postupku nisu nastupile okolnosti iz člana 22. stav 4. Zakona, a posljedično ni iz člana 24. stav 3. tačka c), Konkurencijsko vijeće nije bilo u mogućnosti donijeti konačno rješenje u zakonskom roku.

Članom 11. stav (2) Zakona propisano je da ukoliko Konkurencijsko vijeće ne donese rješenje u roku iz člana 41. smatra se da se postupanjem privrednog subjekta ne zloupotrebljava dominantan položaj. Na poseban zahtjev privrednog subjekta, Konkurencijsko vijeće u skladu sa članom 11. stav (3) Zakona donosi rješenje da se postupanjem privrednog subjekta ne zloupotrebljava dominantan položaj.

Privredni subjekt Telemach d.o.o. je putem advokata Nihada Sijerčića podnio Konkurencijskom savjetu poseban Zahtjev za donošenje rješenja u smislu člana 11. stav (3) Zakona, dana 13.05.2015. godine pod brojem: 05-26-2-013-40-II/14.

Postupajući po Zahtjevu za donošenje rješenja Podnosioca zahtjeva, a imajući u vidu naprijed navedeno, Konkurencijsko vijeće je konstatovalo da je rok za donošenje konačnog rješenja u smislu člana 41. Zakona protekao, te je u skladu sa članom 11. stav (3) Zakona donijelo odluku kao u tački 1. dispozitiva ovog Rješenja.

### **Administrativna taksa**

U skladu s članom 2. tarifni broj 107. stav (1) tačka g) Odluke o visini administrativnih taksi u vezi sa procesnim radnjama pred Konkurencijskim vijećem («Službeni glasnik BiH», broj 30/06 i 18/11) Podnosilac zahtjeva je na ovo Rješenje obavezan platiti administrativnu taksu u iznosu od 1.500,00 KM u korist Budžeta institucija Bosne i Hercegovine.

### **Pouka o pravnom lijeku**

Protiv ovoga Rješenja nije dozvoljena žalba.

Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objave ovoga Rješenja.

**Predsjednica**

**Maida Čampara**